

MANIFESTU POLITICU DE SU COMITADU CONTRA A SU G8

Sa Sardigna est una nassione chena peruna froma de sovranidade politica, economica, culturale. Ancora oe sa globalisatzione corfet su populu sardu, mascamente in tres bessos:

1. Sa deculturatzione, cun s'allontanamentu de sa limba sarda e de su connotu, oramai reduidos a fromas de folklore pro ispassiare e intrattenere sos turistas. A issos los cumbincent a bennere a bidere custa zente istrana, chi faeddat una limba (o faeddu, comente la giamant issos) antiga, a mandigare polcrabu e a si ch'imbolare a modde in su mare nostru, fatende balanzare unu muntone'e inari a sos meres. Sos sardos, imbezis, mascamente cussos de sas "zitades tzivilizadas" si nde faghent sa birgonza de su chi abarrat de s'identidade nostra, trattada che alga'e muntonalzu.

2. Sa colonizatzione economica, ligada a sa culturale, at tancadu sa janna a donzi possibile isvilupu de un'economia sarda "de manu nostra" e at dadu a su capitalismu italiarzu e internatzionale piena libertade de si moere comente lis paret e lis piaghet. Nos ant abatidu s'economia traditzionale de tipu agro-pastorale pro no'che zaccare una de isfrutamentu chi corfet su logu e sas personas. In sos annos '70 sas industrias petrolchimicas isfrutaiant sos tribagliadores sardos e los lassaiant a su destinu issoro de cascaintegratos, cun sa prezisa voluntade de occidentalizare e bochire una cultura gara bia. Sos balanços de sas furas in su logu sunt gitos a continente o in sas manos de sa classe compradora, gasi chi nudda potat essere imbestidu in dunu isvilupu sostenibile e ligadu a sas esizenzias de su populu sardu. Su chi nd'essit est un'economia theracca de s'italiana, chi est fatende a bisera totus sas siendas economicas nostras, comente sa produzzione de sas cacias, s'artejanadu, sas cooperativas agricolas e a bi la sighire. Custa situatzione est gasi irraighinada chi, parte de sos sardos l'intendent comente naturale e chi no si potet vittire.

3. S'ocupatzione militare, su pius giaru de sos medios impreados, ponet in su logu unu muntone'e carabinieri, bases militares italianas, americanas, NATO e partiduras de esercitos de ateros istatos comente Israele, chi s'adrestant a sa gherra e isperimentant armas noas chi, tantas boltas, bochint personas etotu. Est s'assembu de s'arcipelagu de La Maddalena, cuntzedidu in su 1972 (chena persona ratifica de parlamentu) a sa marina militare americana chi b'at postu una base de sutamarinos nucleares. La Maddalena representat bene s'istatu de sas cosas chi sos sardos devent supportare, ca est s'emblema de sa fura'e ispatzios, resurtzas, inare, chi nos corfet. Pustis de 50 annos de lota, in su 2008 sa marina militare americana si nd'at a andare ma, a s'iscutta, s'istatu italianu (e sa theracca sua, sa regione autonoma) at aprontadu su seberu: su g8 e unu muntone'e zimentu de lussu chi colat. Sa matessi istoria a Quirra, Teulada e Capo Frasca, ue s'esercitu italianu e internatzionale s'adrestat cun munissiones a s'uraniu impoberidu cajonende unu numeru disbarattadu de criaduras e bestiamene chi naschent isformados. Custu sempre chena irmentigare sos dannos a sa terra e s'impossibilitade de isvilupare calincuna economia, comente nos demonstrat s'istoria de sos piscadores de Teulada, chi lis ant cazadu su diritu a su tribagliu..

Custa est sa terra chi s'istatu italianu at seberadu che domo de su g8 in su 2009. Bisonzat de conoschere custa situatzione, fraighende una mobilitatzione internatzionale; est importante de torrare a nos ammentare chi su g8 no lu sunt fatende in Italia, lo sunt fatende in Sadigna, e nos charent dare un atera iscutulada a bucca; no potimus abarrare mudos ancora. Zertu, sos moimentos ant a cuntestare su g8 e su cuntennidu de globalisatzione e imperialismu chi gighet, ma, semus cumbintos chi, custas, potant abarrare paraulas boidas si no lis damus una cara e una realidade
concreta.

Representantes Franzesos, Ghermanos, Americanos, Canadesos, Giaponesos, Russos, Inglesos ant a bennere ufficialmente a arrejonare de gherra contra a sa pobertade, a s'AIDS e a sa protetzione de s'ambiente. Imbezis no si dezidit nudda, petzi si cunfrimant puliticas de gherras fatas aterue. Semus d'acordu cun custas criticas, ma est un ateru su contributu specificu chi cherimus batire. Medas de custos istatos repriment cun violentzia sas lotas de liberatzione natzionale chi s'isvilupant in su logu issoro: Su Canada cun su Quebec, Sos americanos cun sos nieddos e sos indianos, s'Inghilterra cun sos Irlandesos, Scotzesos e Gallesos, sa Franza cun sos Corsicanos, Occitanos,

Bretones e Bascos, sa Russia cun sos Cecenos, s'Italia cun sos Sardos. Cherimus chi sas mobilitatziones contra a su g8 de su 2009 appant unu significu in pius de sas semplices lotas contra a sas politicas neoliberalistas de sa globalisassione. Sa nostra est un'appellascione a totus sos moimentos internassionales antimperialistas e anticapitalistas, e a totus sos moimentos chi gherrant in Europa e in su mundu pro li reconnoschere su diritu a s'autodizisione e sa sovranidade politica, economica, culturale.

Pro una fila'e rejones ligadas a s'occupadura italiana puru, sos sardos sunt unu de cussos populos corfidos dae su fenomenu de su disterru. Sunt resessidos a mantennere sas ligaduras cun sa terra issoro e no ant perdidu sas siendas culturales chi battiant. Lu proat sa naschida, in totu su mundu, de chentinaja di sotzius sardos, dae s'America a s'Australia a s'Italia. Est custa Saldigna disterrada, de unu milione e mesu de pessonas chi nos at fatu cumprendere sas potenzialidades mannas chi sos sardos disterrados potent aere in sa lota de liberatzione natzionale e sotziale e pessamus chi custu g8 potat resessire che chentru de agregassione pro totus cussos sardos chi cherent parare custa atziada.

Gasi s'idea de faghene naschere in calincuna zitade italiana e perue sos disterrados sardos sient sos "sotzius de sos disterrados sardos contra a su g8". Cussos ant su compitu de battire cuscientzia e collaboratzione in sa mobilitatzione contra a su g8 e de faghene connoschere sas rejones de sas lotas nostras a s'estèriu, gasi chi s'intumbu de sa chistione sarda potat bessire a campu .

Ischimus bene chi, in Saldigna, su g8 s'isvoligat donzi die e su tribagliu chi cherimus faghene no est s'appontadura de un'eventu mediaticu mannu ma unu biculu in sa lota nostra de liberatzione natzionale e, pius in generale, in sa lota pro s'autodizisione de totas sas natziones chena istatu.